

## Ferzich Johr (a poor Gedangn grundlegend)

Bei Lichd bedrochd (und nadierlich aa im Finsdern) is ferzich eichendlich gor ka Jubiläum.

Fuchzich vielleicht, hunnerd suwiesu, fimpfazwanzich und fimpfasibbzich grad nuch – obber ferzich, iech waas ned.

A bleeda Zohl. Ferzich. Nix halbs und nix ganz.

Obwull – es kimmd nadierlich drauf on, wie mers sichd.

Beim Schofkupf zemm Beischbill sänn ferzich gewaldich ze weng – do langds grad bequem zemm Schneider frei.

Fier Ali Baaba worn widder ferzich Raiber grad richdich. Wenn die obber alla in Bundesdooch nei gwähld wierärdn (würderden), dann hoggerdn nuchmoll ferzich Raiber (und Raiberinnen) mehra drinna wie edsad scho – und dann sänn ferzich ze vill; mid die annern zamm (die edsd scho drinna hoggn) sänn zergor vill ze vill.

Fier mei Fraa widder gibbs ferzich gor ned. Die wärd lieber elfmoll neinadreißich und nocherd gleich fuchzich – walls dann aa scho worschd is.

Mid ferzich Euro wennsd ins Wärdshaus gissd, is des eichendlich genuch – wennsd dann obber gscheiderweis beim Muggn verlierst, konns eng wärn. Vor allem, wennsd scho selber ochd Seidla in dein Grohng neigschumberd hosd, die bezohld wärn wolln.

Ferzich Bee-Ess widderum sänn fier die Audo heidzerdooch orch weng, ferzich Bee-Ess in aaner Kreidler Floredd häsd gor ned bändinga känna.

Ma sichd altzo, es kimmd drauf on – in jeder Beziehung.

Und do sämmer scho beim Dehma: Der Reehrnhieffer Schbordverein wärd nämlich heier ferzich Johr old.

Und fier an Schbordverein sänn edsad ferzich Johr a ganz komischa Zohl. Nuch ned old und aa nimmer jung. Altzo im Endeffegd aa widder nix halbs und nix ganz.

Obber gscheid gfeierd muss nadierlich wärn.

Erschdms muss jeder Vorschond mindestens aamoll a Jubiläum in seiner Amdszeit hohm und zweidns, wennsd bluus alla fuchzich Johr feierst, konnsd als Mitglied ganz schee bleed aus der Wäsch schaua, wennsd zemm folschn Zeidbungd auf die Weld kimmsd.

Wenn zemm Beischbill aaner neinzeahunnerdsechasechzich scho fuchzich wor, dann wärer zwaadausndsechzeah (altzo zemm fuchzichsten) scho hunnerd. Dann is mit gruhß Miedfeiern Äpfel und er dädd sich sich ze Rächd ärchern. Und wenn er vielleicht 2016 gor scho hie is, dann dädder sich nuch mehra ärchern - und do hädder dann nuch mehra Rächd.

Allerdings wär der dann edsd beim ferzichsdn aa scho neinzich - und ob des fier denn dann schöner is, waaß iech allerdings aa ned.

Altzo iss des wohrschainlich egol, obsd dreißich, ferzich odder fuchzich feierst, und des wos die Reehrnhieffer machen, werd scho irchendwie bassn.

Und sulangs kann Ehrnohmd fier „Drei Johr naia Bierfilzla im Schbordheim“ gibbd, sollern mier uns kaana Gedangn machn und lieber a boor Seidla mehra auf na Schbordverein dringn (damid dann die besoochn naia Bierfilzla aa an Sinn ergeh) – gern aa ferzich, wenn die aaner baggd.

Mei bersehnliches Fadsidd: Ned weider drieber nochdengn und miedfeiern.

Aa wenn a seldsams Gfiehle bleibd.

Der Helm (Helmut Völkel)